

Powšitkowne WOZJEWJENJA

njedźelu, 18. julija 2021

Wusyłanje Božej mše

Serbskorěčnu Božu mšu móža wěriwi tutu njedźelu, 18. julija, znowa jako livestream w interneće scěhować. Wona přenese so w 9 hodž. z Chróšćanskeje cyrkwe. Link na nju je pod www.posol.de a na wosadnej stronje podaty.

Beneficny koncert za Morawu

Wjacore hudźbne skupiny chcedža na dobro woporow tornada na južnej Morawje beneficny koncert wuhotować. Tutón wotměje so njedźelu, 25. julija, wot 10 do 13 hodž. na Chróšćanskim farskim dworje. Wšitcy zbliska a zdaloka su na njón wutrobnje přeprošeni. Wobjed budže zaručeny. Zdobom je TCM je ze swojej akciju „Łužica pomha“ po wudyrjenju katastrofy zwisk do Brnjanskeje diecezy na Morawje nawjazało a prosy wšěch naležnje, zo bychu potrjechenych financielnje podpěrali. Pjenježne dary móža so na konto Cyrill-Methodius-Verein e.V., IBAN: DE 65 750 90 300 000 828 23 66, pod hesłom „Morawa“ přepokazać. Štóž swoju dospołnu adresu poda, tomu wustaji TCM darowanisku kwitowanku. Brnjanske biskopstwo potom dary z Łužicy potrjechenym wosadam posrědkuje.

Jězba po slědach swjateje Ludmile

Lětsa spominamy na 1.100lětnu posmjertniny swjateje Ludmile. W Českej so na tutón wjeršk wosebje přihotuja. Na swjatočnosćach chcemy so tež z Łužicy na tym wobdzělić. Jězba do Prahi je planowana wot štwórtka do soboty, 16. do 18. septembra. Program wopřija wodženje po českej stolicy po slědach swjateje Ludmile, winowy swjedzeń w Mělníku a narodnu putnisku Božu mšu w Tetínje, hdžež je swjata Ludmila 15. septembra 921 zemřela. Zajimcy za jězbu měli so hač do pjatka, 30. julija, w Šmitec wozydłownistwje w Radworju přizjewić, telefonowe čisło (03 59 35) 28 60.

Pišćelowy koncert w Baćonju

K ponowjenju pišćelow w Baćońskej cyrkwi wotměje so tam wutoru, 20. julija, w 19 hodž. beneficny koncert. Klaus-Dieter Untch ze Sedmihródskeje w Rumunskej zanjese na pišćelach improvizacije, swójske kompozicije a někotre twórby Johanna Sebastiana Bacha. Zastup je darmotny. Kolekta na kóncu je za ponowjenje pišćelow Božeho domu postajena. Wšitcy su wutrobnje přeprošeni.

Jězba z busom do Bayerskeje

Na serbsku busowu jězbu wot pónđzele do pjatka, 6. do 10. septembra, přeprošuje Radworske Šmitec busowe wozydłownistwo. Duchowny nawod změje farar Gerat Warnar, organizatoriski Borbora Młynkowa. Planowane stacije su mjez druhim Dachau, Neuschwanstein a Füssen, Andechs, Ottobeuren a na dompuću Coburg. Přizjewjenja přijimuje Šmitec wozydłownistwo, telefonowe čisło (03 59 35) 28 60.

W Róžeńće modlenje před Najswjećišim

Na modlenje w serbskej a němskej rěči před wustajenym Najswjećišim sobotu, 24. julija, we 18 hodź. su wěriwi do Róžeńčanskeje swjatnicy přeprošeni. Škitne naprawy maja so wobkedźbować.

Prózdnińska jězba za džěći do Zehrena

Dekanatne dušepastyrstwo džěći přeprošuje šulerki a šulerjow 5. do 8. lětnika w lětnich prózdninach na jězbu do Zehrena blisko Mišna. Wona wotměje so wot pónđzele do pjatka, 23. do 27. awgusta. Swójski přinošk na wobdźělnika wučinja 100 eurow. Přizjewjenja přijimuju hač do njedzele, 18. julija, ale jeničce online. Link na wotpowědnu stro- nu je pod www.posol.de wozjewjeny.

Z busom do Krupki kemši

Na putniku Božu mšu srjedu, 25. awgusta, w 10 hodź. w Krupce pojedže zaso bus. Štóž chcył sobu jěć, měł so w Šmitec wozydłownistwje w Radworju přizjewić, telefonowe čisło (03 59 35) 28 60.

Młodostni na jězbu do Oberammergauwa přeprošeni

Dekanatne dušepastyrstwo za młodžinu přeprošuje serbskich młodostnych klětu w meji na zhromadnu jězbu do Oberammergauwa na předstajenje swětoznatych pa- sionskich hrow. Wotjědu pjatk, 6. meje, nawječor a wróća so njedzelu, 8. meje, wječor. Jónkrótnje móža sej młodostni ze wšeho swěta w starobje 16 do 28 lět tamnišu gene- ralku wobhladać. Z tym dóstanu zastupny lisćik za 24 eurow, kotryž hewak znajmjeńša 150 eurow plaći. Po předstajenju změja přiležnosć, so z dźiwadźelnikami rozmołwjeć. Nimo toho postaraja so Oberammergaučenjo wo kwartěry a zastaranje za přihódnu plaćiznu. Zastup, zastaranje a nócłěh budže dohromady něhdže 70 eurow plaćić. K tomu přińdu kóšty za transfer. Dalše informacije su pod www.jugendtage-passions- spiele.de wozjewjene. Přizjewjenja přijimuje Worklečanske dekanatne młodžinske dušepastyrstwo hač do srjedy, 21. julija, ale jeničce online. Link k tomu je pod www.posol.de podaty. Městna su wobmjezowane.

Wulět młodostnych do Sakskeje Šwicy

Dekanatne dušepastyrstwo młodžiny přeprošuje młodostnych ze wšěch serbskich wo- sadow na zhromadny wulět do Sakskeje Šwicy, a to njedzelu, 19. septembra. Wotjězd budže něhdže w 12 hodź., nawrót je w 20 hodź. planowany. Přinošk we wysokosći 20 eurow wopřija jězbu z busom, jědź a jězbu z čołmom. Přizjewjenja přijimuju so hač do pónđzele, 30. awgusta, online. Wotpowědny link k tomu je pod www.posol.de poda- ty. Dokładny plan, zwotkel bus w kotrym času pojedže, so wšěm, kotřiž su so přizjewili, po 30. awgusće wosobinsce zdžěli.